

Visoki predstavnik pozdravio odlučnost koju pokazuje SFOR u hapšenju optuženih za ratne zločine

Visoki predstavnik, Wolfgang Petritsch, pozdravio je odlučnost koju pokazuje SFOR kada je u pitanju hapšenje optuženih ratnih zločinaca, i uz upotrebu sile ukoliko je to potrebno.

Visoki predstavnik je prokomentirao operaciju koju su u četvrtak organizirale trupe SFOR-a sa ciljem hapšenja Radovana Karadžića. Visoki predstavnik je konstatirao da su silovite mjere koje se poduzimaju u cilju hapšenja osoba optuženih za ratne zločine neophodni elementi u procesu implementacije mira.

Visoki predstavnik je mnogo puta izjavio da hapšenje te otvoreno i pravedno suđenje za sve optužene ratne zločince predstavljaju odlučujući dio procesa pomirenja u BiH i regionu. Postoji hitna potreba da se pravda sprovede i da se vidi da se pravda sprovodi. I implementacija Daytonskog mirovnog sporazuma, i ekonomski razvoj BiH i njeno integriranje u glavne evropske tokove biće potpomognuti hapšenjem ovih pojedinaca i njihovim suđenjima.

U tom kontekstu, Visoki predstavnik je razočaran izjavom koju je dao premijer RS, Mladen Ivanić, u kojoj se gospodin Ivanić požalio na činjenicu da njegova vlada nije bila unaprijed obaviještena o ovoj operaciji SFOR-a. Ova operacija kao i slične operacije SFOR-a bi u cjelosti bile nepotrebne da su organi vlasti RS ispunili svoju zakonsku obavezu da u potpunosti sarađuju sa Međunarodnim krivičnim tribunalom.

Haški tribunal je neovisan sud koji je uspostavljen kako bi se sudilo pojedincima koji su učestvovali u nekim od najmračnijih trenutaka u evropskoj istoriji u posljednjih 50 godina. Izvođenje ovih pojedinaca pred lice pravde će pomoći građanima ovog regiona da prevaziđu nedavnu prošlost.